

Morning Regional Dogri News Bulletin, 26 April, 2026

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- प्रधानमंत्री नरेंद्र मोदी होर अज्ज दिनै 11 बजे अपने माहवार रेडियो कार्यक्रम मन की बात दे राहें देश-विदेश दे लोकें कन्नै बचार सांझे करडन।
- केंद्री खेड्ड मंत्री डॉ. मनसुख मांडविया होरें श्रीनगर च युवा मामलें ते खेड्डें सरबन्धी मंत्रिणं दे चिंतन शिविर दी प्रधानता कीती। एल.जी मनोज सिन्हा होरें बी इस कार्जक्रमें च हिस्सा लैता।
- मुखमंत्री उमर अब्दुल्ला होरें बेंगलुरु आले आउटरीच कार्जक्रमें दरान जम्मू-कश्मीर गी फिल्में दे निर्माण आली इक बेहतरीन थाहर दे तौर पर स्थापित करने दी हिमायत कीती।
- राईजिंग स्टार कोर दे जीओसी राजन शेहरावत होरें जम्मू ते साम्बा दे बन्नै कश फौजी तैयारिणं दा आंकलन कीता।
- मौसम विभाग नै अगले 3 दिनें दे दरान जम्मू संभाग दे केई जिलें च बड़ी मती गर्मी ते लू दी चेतावनी जारी कीती ऐ।

<><><><><><>

PM Mann ki Baat

प्रधानमंत्री नरेन्द्र मोदी होर अज्ज बड्डलै 11 बजे आकाशवाणी पर अपने “मन की बात” कार्जक्रम राए देश-विदेश दे लोकें कन्नै अपने विचार सांझे करगंन।

हर महीने दे खीरी ऐतवार गी प्रसारत होने आहले इस कार्यक्रम दी एह 133मीं किशत होग।  
कार्जक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाईट ते  
न्यूज ऑन ए.आई.आर mobile app- डी.डी न्यूज- प्रधानमंत्री हुंदे दफतर ते सूचना ते प्रसारण  
मंत्रालय दे यू-ट्यूब चैनलें पर बी होग। हिंदी प्रसारण दे तुरत मगरा एहदा क्षेत्रीय भाषाएं च  
अनुवाद प्रसारित कीता जाहग।

<><><><><><>

### Mandaviya- Chintan Shivir

राज्यें ते केंद्र शासित प्रदेशें दे युवा मामले ते खेड्ढ सरबंधी मंत्रिं दा चिंतन शिविर कल  
श्रीनगर च शुरू होआ। उद्घाटनी सत्र गी संबोधित करदे होई केंद्री युवा मामले ते खेड्ढ सरबंधी  
मंत्री डॉ. मनसुख मांडविया होरें आखेआ जे एहदे राएं खेड्ढें गी लेइयै भारत दिएं आसैं-तांगें गी  
जमीनी सतह पर पूरा कीता जाई सकदा ऐ। उनें आखेआ जे 10 बरीं आहले स्हाड़े खाके राएं  
भारत गी खेड्ढें दा इक शक्ति केंद्र बनाने आहला सुखना साकार होना लोइचदा ते एह छड़ा  
कागजें-पत्रें च नेई होना चाइदा। एह हर खेड्ढ मैदान पर हर जिले च ते हर युवा राएं साकार  
होना लोइचदा। उनें आखेआ .....

<><><><><><>

### LG-Chintan Shivir

उपराज्यपाल मनोज सिन्हा होरें बी चिंता शिविर च हिस्सा लैता ते भारत गी खेड्ढें दा केंद्र  
बनाने आहले नजरिए दी सराहना कीती। इस मौके पर बोलदे होई उनें आखेआ जे खेड्ढें गी  
रोजमर्रा दे जीवन दा हिस्सा बनाना लोइचदा।

खेड्डें गी स्टेडियम थमां बाहर कड्डिए गोआंड, गल्लिएं ते मैदानें तगर आह्नना लोडचदा तां जे खडारी तैयार कीते जाई सकन। उनें स्कूल, परौआर ते प्रशासन बश्कार तालमेल पर जोर पाया। उपराज्यपाल होरें आखेआ जे ढांचागत सुविधाएं राएं खडारिएं दी मदद होनी लोडचदी तां जे ओह राष्ट्र थमां अंतरराष्ट्री सतह दे खडारी औने आहले बरें च बनी सकन। इस मौके पर बोलदे होई उनें आखेआ .....

<><><><><><>

### CM-Film Making

मुख्यमंत्री उमर अब्दुल्ला होरें जम्मू-कश्मीर गी सिनेमा लेई इक आदर्श थाहर दे तौर पर बढ़ावा देने लेई बेंगलुरु च फिल्म निर्माताएं कन्नै गल्लबात कीती। फिल्म निर्माण ते इस खेतर च सहयोग लेई मौके दा पता लाने गितै बड्डे ते मन्ने-परमन्ने दे फिल्म निर्माताएं ते फिल्म निर्माण कंपनिएं दे नुमाइंदें दे इक डेलीगेशन नै मुख्यमंत्री हुंदे कन्नै मलाटी कीती। उमर होरें उनेंगी पूरे समर्थन ते कलाकारें लेई इक साजगार म्हौल दा पूरा-पूरा भरोसा दोआया। खिते दे सैलसफा ते फिल्म उद्योगें च मुख् सरबंधत धडें कन्नै मजबूत सरबंध बनाने दे मकसद कन्नै दक्खन भारत च जम्मू-कश्मीर सरकार आसेआ दिते जा'रदे बशेष ध्यान दे इक हिस्से दे तौर पर एह गल्लबात कीती गई। दक्खन भारत गी सिनेमा, रचनात्मकता ते सैलसफा दा इक गढ़ मन्नियै कीती जा'रदी इस पैहलकदमी दा मकसद फिल्म निर्माताएं ते सैलानिएं लेई इक पसंदीदा थाह दे तौर पर स्थापित करना ऐ।

<><><><><><>

## Migrants Ration Card

आपदा प्रबंधन, राहत, आबादकारी ते पुन-निर्माण विभाग दे प्रधान सचिव चंद्राकर भारती होरें कश्मीर ते जम्मू दे विस्थापितें लेई बशेष राहत राशन योजना दे तैहत राशन दी बंड्ड प्रक्रिया दी अमलावरी दी समीक्षा कीती। अधिकारिणं इस मौके पर उनेंगी एह जानकारी दिती जे 17 जहार 500 शा मते विस्थापितें दे राशन कार्ड राश्ट्री खाद्य सुरक्षा कनून दे डेटाबेस कन्ने जोड़े गे न जिसले जे तकरीबन 8 जहार होरनें गी जोड़ने दी प्रक्रिया चला करदी ऐ। बैठक दरान एह फैसला लैता गेआ जे इस गल्लै गी पक्का कीता जाहग जे कोई बी योग्य लाभार्थी खुंजी नेई जा। विस्थापितें गी हर व्यक्ति सहाबै 11 किलो मुफ्त राशन ते 1 किलो खंड बरोबर दिती जंदी रोहग।

<><><><><><>

## GoC Jammu-Samba

फौज दी राईजिंग स्टार कोर दे जनरल आफिसर कमांडिंग लेफ्टिनेंट जनरल राजन शहरावत होरें जम्मू ते साम्बा जिले च फौजी कारवाइए सरबन्धी तैयारिणं दा जायजा लैता। एह जिले अंतरराश्ट्री बन्ने दे नेड़े स्थित न, जेहदे चलदे फौजी तैयारिणं दा महत्व होर बी बधी जंदा ऐ। राईजिंग स्टार कोर दे मूजब, जीओसी होरें जमीनी सतह दिणं तैयारिणं दा आंकलन करदे होई जवानें कन्ने गल्लबात बी कीती। उनें पेशेवराना रौंस, तैयारिणं ते समर्पण भावना लेई जवानें दी बड़ी मती सराहना बी कीती।

फौजी कमांडर हुंदा एह दौरा, बन्ने आले इलाकें च सुरक्षा बरकरार रखने ते कुसै बी चुनौती दा असरदार ढंगगै नै मुकाबला करने दे भारती सेना दे मजबूत धेड़यै गी बी दर्शादा ऐ।

<><><><><><>

### CS-HADP

मुख्य सचिव अटल डुल्लू होरें कल इक बैठक लाड़यै राईबाई दे पूरे-पराते विकास सरबन्धी प्रोग्राम तैहत जम्मू-कश्मीर च हासल प्रगति दा जायजा लैता। बैठक दरान कायम सरबन्धत ढांचे, मुख्य बिंदुएं, माली स्थिति, रोजगार सृजन ते जिले स्हाबै कारकरदगी दा जायजा लैता गेआ। इस दरान एह जानकारी बी दिती गई जे करसानें गी दिती गेदी तकरीबन 450 करोड़ रपे दी सब्सिडी राएं उंदी आमदन बढोग ते आर्थिक तौर पर ओह सशक्त होडन। मुख्य सचिव होरें लोकें तगर सरकारी सेवाएं गी पजाने ते योग्य करसानें गी स्कीम तैहत आहन्नने पर जोर पाया। उनें ऐसे जिलें गी तरजीह देने लेई आखेआ जित्थे इस भेठा घट्ट कम्म कीता गेआ ऐ।

<><><><><><>

### Weather

जम्मू-कश्मीर च शनिवारें मौसम दे बड़े गै बकखरे-बकखरे रूप दिक्खने गी लब्बे। कश्मीर च जित्थे पूरी राती बरखा होई उत्थे गै जम्मू दे मैदानी इलाकें च जबरदस्त गर्मी दा प्रकोप जारी रेआ। मौसम विभाग नै जम्मू, कठुआ, साम्बा, रियासी ते उधमपुर जिलें च अगले त्रै दिनें लेई किश थाहें पर लू ज्नेह् हालात बने दे रौहने दी पेशनगोई कीती ऐ। जम्मू च कल दिनें दा बद्दोबद्द तापमान 39 अशारिया 5 डिग्री सेल्यिस दर्ज कीता गेआ।

प्रशासन नै लोकें गी सलाह दिती ऐ जे ओह बड़ी मती गर्मी आहले समें दरान बाहर नेई निकलन ते सुद्धा पानी पीन। लोकें गी लोड़चदा ऐ जे ओह पानी सने ओ.आर.एस जां रिवायती लसी बगैरा दा बी इस्तेमाल करन तां जे गर्मी सरबंधी बमारिएं थमां बचेआ जाई सकै। मौसम विभाग दे निदेशक मुख्तार अहमद होरें आखेआ .....

<><><><><><>

### Unity-March

प्रदेश च चलाए जा'रदे नशामुक्त जम्मू-कश्मीर अभियान दे इक हिस्से दे तौरा पर डोडा च जागतें दे सरकारी हायर सकेंडरी स्कूल दे विद्यार्थिएं लेई एकता मार्च आली मैराथन दा सरिस्ता कीता गेआ जेहदे च बड़ी बद्द गिनतरी च प्रतिभागिएं हिस्सा लैता। इस मौके पर विद्यार्थिएं नशामुक्त समाज ते सेहतमंद जीवनशैली दा संदेश, लोकें धोड़ी पजाया। डोडा दे डिप्टी कमिशनर कृष्ण लाल होरें प्रतिभागिएं गी संबोधित करदे होई उनेंगी गुजारश कीती जे ओह नशामुक्त अभियान दा स्नेहा दूरै-दूरै धोड़ी पजान। उनें आखेआ जे जिले गी नशामुक्त बनाने च नौजवानें दी भूमिका बड़ी अहमद ऐ। इस बारै अपने होर बचार सांझे करदे होई डोडा दे डिप्टी कमिशनर कृष्णन लाल होरें आखेआ .....

<><><><><><>